

Artista creativo, Robert Tromp

Aruba Mural Projects lo trece mas hendenan y colorido na San Nicolas

ORANJESTAD – E lider di e proyecto Aruba Mural Projects ta e artista creativo, Robert Tromp kende a biba basta aña na Hulanda y awor ta masha entusiasma cu e proyecto aki. “Ma caba bin Aruba, y ma cay den un proyecto sumamente interesante y positivo pa Aruba”, el a bisa. E proyecto aki den su fase inicial ta haya sosten financiero di Unoca y

Triple A.

El a bisa cu e ta un proyecto, ya cu nan ta biniendo cu mas proyectonan di e tipo aki no solamente pa San Nicolas, sino rond di Aruba. Inicialmente nan lo cuminsa pinta arte mural cu un grupo di artista local riba e muraya di e refineria na haltura di e rotonde di Sa Nicolas Store. E intencion tras di esaki ta pa e mural bira un atractivo mas

pa San Nicolas por haya mas volumen di bishitantenan. Pero tambe e muralnan aki lo trece mas colorido na San Nicolas, specialmente den e areanan shinishi di e ciudad aki.

E concepto di cada mural ta cu cada un di nan mester conta un historia, y no solamente e mester ta un concepto artistico y bunita. “Full e arte tin un historia conta su tras”, Tromp a bisa. E proyecto aki

lo bin combina cu un tayer pa artistanan local. E proyecto aki no solamente lo trece artistanan hunto sino hobenan, hende local y turistanan. Inicialmente nan lo pinta shete pida di muraya. Nan a selecta 15 hoben di seis scol y tambe 10 artista y hendenan

creativo lo wordo selecciona tambe. Lo tin un exposicion dia 25 di juli na Scol di Arte San Nicolas, unda nan lo wordo presenta. E muchanan lo yuda e artista den e faceta pa pinta e mural pa asina e futuro generacion lo yena mas cu cultura y arte. □